

I cors di lenghe furlane a rivin online

ARLeF e Filologjiche adun par garantî la continuitât al insegnament de lenghe furlane ancje in tims di pandemie. Al sarà presentât ancje un gnûf manuâl pal studi de lenghe e de culture furlane

Gnove version pai cors pratics di lenghe furlane inmaneâts de Societât Filologjiche Furlane e sostignûts de ARLeF - Agenzie Regjonâl pe Lenghe Furlane. La ativitât formative **gratuite**, chest an e varà un aspjet gnûf e impuartant: lis leziions di alfabetizazion (**che a tacaran cui 8 di Fevrâr**), destinadis al massim a 90 participants, si fasaran **dal dut online**, su lis platformis Moodle e Zoom. Al è stât sclârît vuê in ocasion de conference stampe di presentazion là che a son intervignûts l'assessôr aes autonomiis locâls de Regjon Autonome Friûl – Vignesie Julie, Pierpaolo Roberti, Eros Cisilino, president de ARLeF e Federico Vicario, president de Societât Filologjiche Furlane (SFF).

«Al è impuartant infuartî l'ûs de lenghe furlane: il cors che ARLeF e Filologjiche a organizin insiemi par garantî continuitât ae formazion in marilenghe, ancje in tims di pandemie, al darà un supuart valit par dâ lis primis basis di gramatiche, par inressi la cognossince e l'ûs de lenghe e par continuâ a coltivar la braûre di jessi furlans», **al à sotlineât l'assessôr Roberti**, ricuardant cemût che "intant che o sin daûr a vivi une crisi sanitarie e economiche che e influîs in maniere direte su lis cassis de Regjon, si varessin podût justificâ tais: nô no ju vin fats, e no vin nissune intenzion di aplicâju al setôr des lenghis minoritariis che, o ribatìn, a son essenziâls pe nature stesse de Regjon F-VJ».

«I crodin une vore a cheste gnove propueste formative, che e aderis in maniere perfete al contest che si cjatin a vivi - **al à precisât il president de ARLeF** -. La pandemie e à cambiât dal dut tantis nestris abitudins, tacant des modalitâts didatichis tradizionâls. Sielzi di puartâ sul web i cors di furlan nus da la ocasion di slargjâsi a un public simpri plui grant, rivant ancje a cui che - par diviers motîfs - nol rivave adore a partecipâ aes leziions in presince, e che cumò invezit al podarà aprofitâ di cheste oportunitât, stant che i contignûts des leziions a son disponibii daûr des sôs dibisugnis di orari».

«Chestis azions a rapresentin l'impegn e la continuitât di azion che a animin di simpri sedi la Societât Filologjiche Furlane che la ARLeF – **al à marcât il president de SFF** –. Une colaborazion che intai ultins agns e à cjatât stradis simpri gnovis e miôr par otignî risultâts comuns. Par chest, o vin di lei cun cetant favôr il sfuarç di chescj doi sogjets pe promozion dal furlan ancje midiant di struments gnûfs che la tecnologjie nus met a disposizion, e che il moment nus oblee a adotâ. Pes leziions, o vin sielzude une plateforme che e da une garanzie sigure e che e je za sperimentade par dut il mont cun risultâts otims pe didatiche universitarie, ma che ancje utents mancûl esperts a puedin disfrutâ in maniere facile».

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Chê dai cors online e je une sielte obleade par vie de situazion là che si cjate il Paîs; dut cês, e je za stade metude in vore, ancje se in maniere parziâl, te ultime part dal 2020. Di fat, daspò de suspension des ativitâts in presince su la fin di Fevrâr, e dopo di une riprese curte e di un secont stop, i 12 cors, organizâts ancje cu la colaborazion des Aministrazions comunâls, a son lâts indenant in modalitât online e si sono sierâts tal mêis di Dicembar dal 2020.

I cors pratics di lenghe furlane a tornin intal 2021, duncje, cuntune forme gnove e cuntune strutture ancjemò plui articolade, furnint struments simpri plui pratics e utii ai iscripts che - se a frequentaran almancul il 70% des lezioni - a riceveran un atestât di partecipazion: un titul culturâl par acedi ae liste regjonâl dai insegnants cun competencis in lenghe furlane.

La gnove oportunitât formative e dopre tant che fonde i contignûts dal prin volum de golaine "Lenghe e culture" dedicât ae formazion dai adults. Il plan de opere al previôt 3 fassicui di 112 pagjinis ognidun, cuntun libri par ogni an di cors (I, II e III), spartît in 12 unitâts didatichis. Ogni unitât e presente une leture cun provis di comprension dal test, aprofondiments di gramatiche e esercizi, cun dificoltais cressintis sedi tal lessic che inte morfologjie verbâl. Il manuâl al è duncje organizât su la progression e su la gradualitât intal disvilup des abilitâts linguistichis. Il volum stampât al è a disposizion a gratis intes sedis de ARLeF e de SFF; in version digjitâl su www.arlef.it e www.filologicafriulana.it.

Pal cors in partence la prime setemane di Fevrâr a **son in program 10 lezioni asincronis, su Moodle** (ogni setemane al sarâ publicât materiâl gnûf, che al restarâ simpri a disposizion), che a favorissin la riflession, il studi in autonomie e che a rimandin ai **trê incuintris sincrons par sclariments e confronts, su Zoom**, ognidun di une ore cirche.

Pes iscrizions si pues contatâ Elena De Sanctis telefonant al 0432 501598, o scrivint a formazione@filologicafriulana.it

Udin, ai 26 di Zenâr dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<<